

Inatsisissatut siunnersuummut oqaaseqaatit

Oqaaseqaatit nalinginnaasut1. Inatsisissatut siunnersuutip tunuliaqutaa

Siunnersuutigineqarpoq raajanut akitsuutip naatsorsorneqarnerani aallaavissamik nutaamik atuutilersitsisoqassasoq, tassa nunanut allanut nioqquteqartoq (tunisisoq) assartuinermi aningaasartuutit raajat tunineqartut akiisa naatsorsorneranni ilanngussisimatinnagu atorneqartussamik.

Akitsuut raajat tunineqartut akiat tunngavigalugu maanna naatsorsorneqartarpoq. Tunisinermi aki pisisup tunisisullu isumaqatigiissutigisaat kisimi pineqarpoq, tassa tuniniaanermi, nassiusinermi il.il. aningaasartuutit ilanngarnagu.

Naatsorsuinernulli tunngavik akitsuutip akilerneqartup assigiinngissinnaanerani kinguneqarpoq, tassami nunanut allanut nioqquteqartut niueriaasiisa assigiinnginnerisa nassatarimmassuk nunanut allanut nioqquteqartut ilaasa tunisat Kalaallit Nunaanniit apuuffissaannut assartuinermi aningaasartuutit akilertarmatigit, aningaasartuutillu raajat tunisamik akiisa naatsorsorneranni ilannguttarlugit, nunanullu allanut nioqquteqartut allat assartuinermi aningaasartuuteqanngitsut tunisinermi aki appasinnerusoq angusarlugu taamaalillutillu akitsuummik minnerusumik akiliisussaallutik.

Nunanut allanut nioqquteqartoq assartuinermi aningaasartuutit raajat tunineqartut akiisa naatsorsorneranni ilanngussisimannikkaangat akitsuummik naatsorsuinissamut aallaavissamik nutaamik atuutilersitsiniarluni naatsorsuinermut tunngavimmik allannguissamik siunnersuut akitsuutip assigiiarnerusumik naatsorsorneqarnissaanik qulakkeeriniarnermik tunngaveqarpoq, naak nunanut allanut nioqquteqartut assigiinngitsunik niueriaaseqaraluartut.

Aallaavissaq maanna atorneqartutuulli naatsorsorneqassaaq, akitsuutilli appasinnerusumik killeqartinneqarnera allaassutigalugu, tassa imaappoq kiilumut 10,70 kr.-nit.

Siunnersuutip isertitatigut annikitsuinnarmik allannguuteqartitsinissaa ilimagineqarpoq.

2. Inatsisissatut siunnersuutip imai

Siunnersuutigineqarpoq raajanut akitsuutip naatsorsorneqarnerani aallaavissamik nutaamik atuutilersitsisoqassasoq, tassa nunanut allanut nioqquteqartup assartuinermi aningaasartuutit tunisinermi akip naatsorsornerani ilanngussimanngikkaangagit atorneqartussamik.

Siunnersuutip kingunerissavaa nunanut allanut nioqquteqartut, Kalaallit Nunaata nassiussiviullu akornanni assartuinermi aningaasartuuteqanngitsut akitsuut akiligassartik aallaavissaq kiilumut 10,70 kr.-inik aallaaveqartoq tunngavigalugu naatsorsortassagaat, nunanullu allanut nioqquteqartut assartuinermi aningaasartuuteqartut aallaavissaq maannamut atuuttoq kiilumut 11,70 kr.-iusoq aallaavigalugu akitsuummik naatsorsuisassallutik.

3. Pisortanut aningaasatigut allaffissorinnikkullu sunniutissai

Siunnersuut allaffissornermut sunniuteqassanngilaq.

Allanguutip 3 mio. kr.-it missaannik isertitaqarnerunermik kinguneqarnissaa ataatsimut naliinikkut ilimagineqarpoq.

4. Inuussutissarsiutinik ingerlataqartunut aningaasatigut allaffissorinnikkullu sunniutissai

Nunanut allanut nioqquteqartut tunisamik akiisa naatsorsorneranni assartuinermi aningaasartuutinik ilanngussisannngitsut akitsuummik siusinnerusumut sanilliullugu qaffasinnerusumik akiliisalissapput.

Siunnersuutip kingunerissavaa aallaavissaq, nunanut allanut nioqquteqartut assartuinermi aningaasartuuteqartartut raajanut akitsuummik naatsorsuineranni atorneqartartoq, nunanut allanut nioqquteqartut assartuinermi aningaasartuuteqartanngitsut peerpata annikitsumik qaffariaateqassasoq. Taamaalillutik nunanut allanut nioqquteqartut assartuinermi aningaasartuuteqartartut raajanut akitsuummik qaffasinnerusumik akiliisalissapput.

5. Avatangiisinut pinngortitamullu sunniutissai

Avatangiisinut pinngortitamullu sunniuteqassanngilaq.

6. Innuttaasunut aningaasatigut allaffissorinnikkullu sunniutissai

Siunnersuutip innuttaasunut allaffissornermut sunniuteqarnissaa ilimagineqanngilaq.

7. Naalagaaffeqatigiinnermut Namminersorlutillu Oqartussanut tunngasut

Inatsisissatut siunnersut naalagaaffeqatigiinnermut tunngasunik imaqqanngilaq.

8. Oqartussaasunik soqutigisaqatigiinnillu tusarniaaneq

Siunnersuut ukununnga tusarniaassutigineqarpoq:

Inuussutissarsiornermut Suliffeqarnermullu Naalackersuisoqarfik, Aalisarnermut, Piniarnermut Nunalerinermullu Naalackersuisoqarfik, KANUKOKA, KNAPK, Kalaallit Nunanni Sulisitsisut Peqatigiiffiat, Royal Greenland A/S, Polar Seafood aamma SIK.

Inatsisissatut siunnersuut oqaaseqaatitaalu aamma tamanut saqqummiunneqarput NANOQ-mi, Tusarniaaffimmi, aammalu Akileraartarnermut Aqutsisoqarfiup nittartagaani.

Tusarniaanermut akissuteqarnissamut killissarititaasup qaangiunnerani tusarniaanermut akissutit Kalaallit Nunaanni Sulisitsisut Peqatigiiffianit aamma Aalisarnermut, Piniarnermut Nunalerinermullu Naalackersuisoqarfimmit tiguneqarput.

Aalisarnermut, Piniarnermut Nunalerinermullu Naalackersuisoqarfiup siunnersuut tapersersorpaa, Naalackersuisoqarfillu isumaqarpoq siunnersuut raajanik nunanut allanut nioqquteqar-neq pillugu misissueqqissaarnermut naapertuuttusoq.

Oqaatigineqassaaq pineqarmat raajat pillugit qanittuklut misissueqqissaarneq Grønlands Revisionskontor-imit suliarineqartoq.

Nalunaarusiami takuneqarsinnaavoq nunanut allanut nioqquteqartut nunanut allanut nioqquteqarnerminni agguaqatigiissillugu akigititaat annertuunik assigiinngissuteqartut. Taama assigiinngissuteqarnerannut pissutaavoq nunanut allanut nioqquteqartut ilaasa tunisinerminnut aningaasartuutitit raajat tunineqarnerisa akiinik naatsorsuinerminni ilannguttarsimannngim-matigik. Nunanut allanut nioqquteqartoq taamaaliornermigut raajanut akitsuutikkut sipaaruteqartarpoq.

Kalaallit Nunaanni Sulisitsisut Peqatigiiffiata tusarniaanermut akissutaani oqaatigineqarpoq kaaviiartitat akitsuuserniarneqarnerat suli eqqarsarnartoqartikkitsik. Kalaallit Nunaanni Sulisitsisut Peqatigiiffiat, inuussutissarsiutip iluani iluanaarutit akitsuutillu maannakkut angissusia eqqarsaatigalugit isumaqarpoq raajanut akitsuutit pillugit inatsimmi allannguuteqartitsinissaq naleqquttuunngitsoq.

Aamma Kalaallit Nunaanni Sulisitsisut Peqatigiiffiata oqaatigaa raajanut akitsuut ingerlatseqatigiiffiit unammillersinnaanerannut iluaqutaanngitsoq, ingerlatseqatigiiffimmi iluanaarutaat akitsuuteqartitsinermi apeqqutaatinneqanngimmata.

Akitsuutinik amerlanerusunik akiligassiinissaq inatsisissatut siunnersuutikkut anguniagaanngilaq, taamaallaalli ingerlatseqatigiiffiit akitsuutitigut assigiimmik pineqarnissaat kissaatigineqarluni, nunanut allanut nioqquteqartut niueriaasii apeqqutaatinnagit.

Inatsisissatut siunnersuut ingerlatseqatigiiffinnut, raajat tunineqartut akiisa naatsorsornerini assartuinnermut aningaasartuutiminnik ilanngussisareersunut akitsuutitigut nammakkersuinnermik annertuumik allannguinaaviannngilaq.

Kalaallit Nunaanni Sulisitsisut Peqatigiiffiat isumaqarpoq allannguutissatut siunnersuut aalajangiutivinneqassappat tamanna ima aaqinneqartariaqartoq umiarsuaatileqatigiiffiit tamavimmik periuseq ataaseq malillugu akiliisassasut.

Inatsisissatut siunnersuutip nunanut allanut nioqquteqartut niueriaasiinik kalluaannginnissaa siunertarineqarpoq. Taamaammat akitsuummik naatsorsueriaatsimik ataasiinnarmik atuiinnarnissaq naleqquttuutinneqanngilaq.

Kalaallit Nunaanni Sulisitsisut Peqatigiiffiata aammattaaq oqaatigaa nunanut allanut nioqquteqartut assartuinnermut aningaasartuutiminnik tunisat akiinik naatsorsuinnerminni ilanngussisannngitsut akitsuummik qaffasinnerungaartumik akiliisalernissaat naatsorsuinnermi aallaavisap nutaap kingunerissagaa. Kalaallit Nunaanni Sulisitsisut Peqatigiiffiat isumaqarpoq tamatum sunniutigiinnassagaa naalakkersuisoqarfiup nunanut allanut nioqquteqartut pinngitsaalilugit raajat tunisamik akiinik naatsorsuinnerminni tunisinnermut aningaasartuutiminnik ilanngussisalernissaat angussagaa.

Inatsisissatut siunnersuutip siunertarinngilaa nunanut allanut nioqquteqartut niueriaasiinik sunniinissaq, tassa naatsorsueriaatsit arlaata aapparminit pitsaaquteqarnerulersinneratigut. Assartuinnermi aningaasartuutit tunisinnermi akit naatsorsorneranni ilanngunnerat ilanngutinnginneralluunnit eqqarsaatigalugu naatsorsuinnermut aallaaviup sumilluunniit kalluaannginnissaata qulakkeerneqannginnera ilumoorpoq. Naatsorsueriaatsikkulli suut tamaasa ataasimut isigalugit assigiiaakannersumik angissuseqarnissaa anguniarneqarpoq.

Kalaallit Nunaanni Sulisitsisut Peqatigiiffiata oqaatigaa assartuinnermi aningaasartuutit akitsuutip naatsorsorneqarnerani ilanngunneqartariaqanngitsut, tassami assartuineq akitsuutinik allanik akiliisitsiffiusareemat.

Inatsisissatut siunnersuutip nunanut allanut nioqquteqartut niueriaasiinik kalluaannginnissaa siunertarineqarpoq. Taamaammat ingerlatseqatigiiffiit assartuinnermi aningaasartuutiminnik ilanngussinissaat ilanngussinninnissaalluunniit taakkunangga namminermit aalajangigasannngortinneqarpoq.

Aamma Kalaallit Nunaanni Sulisitsisut Peqatigiiffiata naatsorsuutigaa aalisarnermik inuussutissarsiutillit aningaasartuutiniq sulii amerlanerusunik akiligassinneqarnissaat, Danmarkimimi Fødevarestyrelse (inuussutissat pillugit aqutsisoqarfik) aalisakkanik inuussutissanillu nakkutilliinermut akigititaminik qaffaanissamik ilimasaaruteqarmat.

Danmarkimi Inuussutissat, Nunalerineq Aalisarnerlu pillugit Ministereqarfiup, Kalaallit Nunaanni suliffeqarfinnik aalisakkanik suliaqarfiusunik nunanullu allanut nioqquteqarnissamut akuerisaasunik nakkutilliinermik ingerlataqartup nalunaarutissaq tusarniaassutigineqarsimasoq naapertorlugu siunniussimavaa nakkutilliinermut akiliutigitittakkani qaffanniarlugit.

Akitsuummik qaffaanissaq raajanut akitsuutit pillugit inatsimmut allannguutissatut siunnersuutikkut anguniarneqanngilaq, taamaallaalli nunanut allanut nioqquteqartut akitsuummik akiliisarnikkut naligiimmik pineqarnissaannik siunertaqarluni, nunanut allanut nioqquteqartut niueriaasii apeqqutatinnagit.

Siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Siunnersuutigineqarpoq akitsuutip naatsorsorneqarnerani aallaavissamik nutaamik atuutilersitsisoqassasoq, tassa nunanut allanut nioqquteqartut akitsuummik akiliisussaasut raajat tunisamik Kalaallit Nunaanniit apuuffissaannut assartornerini aningaasartuutiminnik ilanngussimatinnagit atorineqartussamik.

Aammattaaq siunnersuutigineqarpoq raajanut akitsuut 45,00 procentiusoq, tunisinermi aki agguaqatigiissillugu kiilumut 55,70 kr.-iugaangat akilerneqartartoq tassaassasoq raajanut akitsuutip qaffasinnerpaaffissaa.

Siunnersuutigineqarpoq § 4, imm. 5-imi 6-imilu aalajangersakkat aamma atuutissasut nunanut allanut nioqquteqartoq assartuinnermut aningaasartuutinik raajat tunisami akiinik naatsorsuinnermini ilanngussisimanngitsillugu akitsuutip naatsorsorneqarnerani. Aallaavissaq raajat akitsuusigassat tunineqartut agguaqatigiissillugu kiilumut akiat tunngavigalugu aalajangerneqassaaq, naatsorsorneqassallunilu ukiup sisamararterutaani malittariinni sisamani raajat akitsuusigassat tunineqartut agguaqatigiissillugu kiilumut akiat tunngavigalugu. Aallaavissamik aaqqiineq aallaavissamik § 4-miittumik aaqqiinertulli pissaaq, taamatullu aaqqiivigineqassalluni ulluni 15. november, 15. februar, 15. maj aammalu 15. august.

§ 2-mut

Inatsisartut inatsisaata 1. januar 2012-imi atuutlernissaa siunnersuutigineqarpoq.